

दिनांक 11.04.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेन्द्र मोदी कह्यो-मौजूदा दौर मांय हर तरफ़ **मेड इन इंडिया** री गूँज- भारत मांय बण्या सामान री दुनियाभर मांय मांग ।
- जयपुर कने रामगढ़ बंधा मांय पाणी लावण री कवायद सरू-जल संसाधन मंत्री सुरेश सिंह रावत इण ऊं जुड़्या कामां री सरूआत कीनी ।
- राज्य मांय केई ठौड़ां आंधी अर हल्की बारिश-जयपुर, हनुमानगढ़ अर नागौर ज़िलां मांय कटे-कटे ओळा पड़्या ।
- महान शिक्षाविद अर समाज सुधारक महात्मा ज्योतिबा फुले री जयंती रे मौके आज वां ने सिरधा भाव सागे याद करी ज्या ।

प्रधानमंत्री नरेन्द्र मोदी कह्यो है के अब हर ओर **मेड इन इंडिया** री गूँज सुनाई देवण लागी है अर भारत मांय बण्या सामानां री पूरी दुनिया मांय मांग बधती जा रही है । वे आज उत्तर प्रदेश रा वाराणसी मांय न्यारी-न्यारी परियोजनावां रा उद्घाटन अर शिलान्यास समारोह मांय बोल रह्या हा । श्री मोदी कह्यो के भारत री कला अर होशियारी ने तेज़ी ऊं दुनियाभर मांय ओळखाण मिल रही है अर केई चीजां ने जीआई टैग मिल्यो है ।

श्री मोदी कह्यो के लारला दस साल मांय देश रो दूध उत्पादन करीब 65 फीसदी बध ग्यो है । वे कह्यो के आज भारत दूध पैदा करण वालो दुनिया रो सब ऊं मोटो देश है । प्रधानमंत्री कह्यो के आ कामयाबी देश रा लाखां किसानां अर पशुपालकां री है ।

जयपुर कने रामगढ़ बंधा मांय पाणी पूगावण सारू आज बंधा री मरम्मत अर वां ने और रूपाळो बणावण रो काम सरू करी ज्यो । जल संसाधन मंत्री सुरेश सिंह रावत अर जयपुर ग्रामीण सीट ऊं सांसद राव राजेन्द्र सिंह बंधा री पाल माथे मरम्मत रा काम री नींव रखी । ई रा तैत पाल माथे बणी दो किलोमीटर लम्बी सड़क ने करीब अढ़ाई करोड़ रूप्या रा खर्च ऊं ठीक करायी जावेला । ई सागे ई कन्ट्रोल रूम भवन री मरम्मत अर डूब हलका अर छतरी ने और बेहतर बणावण रा काम कराया जावेला । ई मौके श्री रावत कह्यो के राम जल सेतु लिंक परियोजना रा तैत रामगढ़ बंधा ने ईसरदा बंधा ऊं जोड़ी ज्यो है । वे कह्यो के आं कामां ऊं किसानां, पशुपालकां अर गांव वालां ने पाणी री परेशानी ऊं निजात मिलेला ।

केन्द्रीय मंत्री अर अलवर रा सांसद भूपेन्द्र यादव काल सांसद संपर्क संवाद यात्रा सुरू करेला। 14 अप्रैल ताई चालण वाळी ई यात्रा रे दौरान वे अलवर री न्यारी-न्यारी ग्राम पंचायतसं रो दौरा करेला। ई दौरान श्री यादव जनता सागे बातचीत ई करेला। वे बजट मांय करी ज्या न्यारा-न्यारा ऐलाण रा तैत कराया जा रह्या कामां अर जनता रा भला री योजनावां रो जायजो ई लेवेला।

जयपुर रा राष्ट्रीय आयुर्वेद संस्थान मांय आज राष्ट्रीय आरोग्य मेळो सुरू व्हयो। आयुष मंत्रालय री ओर ऊं अखिल भारतीय आयुर्वेद महासम्मेलन रा ई चार दिन रा मेळा रो उद्घाटन उपमुख्यमंत्री प्रेमचंद बैरवा कीनो। ई मौके श्री बैरवा कह्यो के प्रधानमंत्री नरेंद्र मोदी न्यारो आयुष मंत्रालय बणा र ईलाज रा पारंपरिक तरीकां रा बारा मांय घर-घर जाग जगावण री पहल कीनी है। वे कह्यो के प्रदेश मांय ई आयुष ने बधावो देवण सारू केई खास जतन करी ज्या है।

जळसा मांय आयुष मंत्रालय रा सचिव वैद्य राजेश कोटेचा कह्यो के आवती सदी ईलाज रा आयुष तरीका री है। वे कह्यो के आयुष माथे लोग ओजू भरोसो करण लाग्या है अर दुनिया भर मांय इण री मांग बधी है। मेळा मांय मरीजां री मुफ्त स्वास्थ्य जांच ई करी जा रही है। अखिल भारतीय आयुर्वेद महासम्मेलन रा संरक्षक पद्भूषण ऊं नवाजी ज्या वैद्य देवेंद्र त्रिगुणा आकाशवाणी ने बतायो के मेळा मांय देशभर ऊं आया 600 जाणकार न्यारा-न्यारा तकनीकी सत्रां मांय विचार बतावेला।

राजस्थान कर्मचारी चयन बोर्ड री ओर ऊं काल राजस्थान जेल प्रहरी भर्ती परीक्षा 2024 राख्यी जावेला। दो पारियां मांय ली जावण वाळी ई परीक्षा ऊं जेल पहरेंदारां रा 803 ओहदां माथे नौकरी दी जावेला।

राज्य मांय दिन अर रात रो तापमान 2 ऊं 3 डिग्री सैल्सियस ताई उतर्यो है। काल सुरू व्हयो आंधी बारिश रो दौर आज ई झालावाड़, नागौर, चूरू अर कोटपूतली-बहरोड़ समेत केई ठोंडां चालतो रह्यो। जयपुर, हनुमानगढ़ अर नागौर जिलां मांय ओळा पड़्या। नुवा पश्चिमी विक्षोभ रा असर ऊं भरतपुर, दौसा, वनस्थली, बीकानेर अर सीकर समेत केई ठोंडां आंधी चाली अर छांटो-छिड़को व्हयो। सवाईमाधोपुर, झालावाड़ अर हनुमानगढ़ मांय तेज गर्मी अर तीखा तावड़ा पाछे दोपहरां री बगत छांटो-छिड़को व्हयो। दूजी कानी कठे-कठे लू रा हालात रह्या। बाड़मेर मांय पारो 44 डिग्री सैल्सियस ने पार कर ग्यो। डबोक अर श्रीगंगानगर मांय अधिकतम तापमान 43 डिग्री सैल्सियस ऊं ऊंचो रह्यो। घणखर ठोंडां दिन री बगत तापमान 40 डिग्री सैल्सियस ऊं बत्तो दर्ज कर्ग्यो जा रह्यो है। मौसम केन्द्र जयपुर रा निदेशक राधेश्याम शर्मा बतायो के काल पश्चिमी विक्षोभ रो असर और बत्तो निजर आवेला।

तेज गर्मी अर लू ने ध्यान राखता थकां मुख्यमंत्री भजन लाल शर्मा जिला कलेक्टरां ने आपातकालीन योजना रे मुजब 15 मई ताई पीवण रा पाणी रा ज़रूरी प्रबंध तैय करण रा हुकम दीना है।

महान शिक्षाविद् अर समाज सुधारक महात्मा ज्योतिबा फुले री 198वें वीं जयंती रे मौके आज वां ने सिरधाभाव सागे याद कर्ग्या जा रह्या है। ई मौके जयपुर रा मुहाना मंडी परिसर मांय राख्यी ज्या

जळसा मांय मुख्यमंत्री भजन लाल शर्मा ई सिरकत कीनी। वे कह्यो के महात्मा ज्योतिबा फुले भारत रा समाज ने नुवी दिशा दीनी। मुख्यमंत्री कह्यो के राज्य सरकार फल-तरकारियां रा कारोबारियां अर बागवानी करण वाळा किसानां रा भला सारु केई खास फैसला कीना है।

कार्यक्रम मांय उप मुख्यमंत्री डॉ. प्रेमचन्द बैरवा अर सामाजिक न्याय अर अधिकारिता मंत्री अविनाश गहलोत ई मौजूद रह्या।

मुख्य सचिव सुधांश पंत आज दौसा मांय पीवण रा पाणी ऊं जुड़ी तैयारियां रो जायजो लीनो। वे कह्यो के उनाळा मांय पाणी अर बिजली री पूर्ति बणायी राखणी व्हेला, ताकि जनता ने कोई परेशानी नी व्हे। मीटिंग मांय श्री पंत प्रदेश मांय जलदाय विभाग रा कर्मचारियां री छुट्टियां निरस्त करण रा हुकम दीना, हालांकि खास हालात मांय जिला कलेक्टर कर्मचारियां री छुट्टी मंजूर कर सकेला।

मुख्य सचिव जिला मांय चाल रही न्यारी-न्यारी सरकारी योजनावां रा तैत कर्या जा रह्या कामां रो जायजो लीनो। श्री पंत मुख्यमंत्री जल स्वावलंबन अभियान 2.0 रा काम चौमासा ऊं पैली पूरा करावण अर हरियाळो राजस्थान अर एक पेड़ मां के नाम अभियान रा तैत पौधा रोपण बाबत् ई जरूरी हुकम दीना।

राज्य री एन्टीगैस्टर टास्क फोर्स-एजीटीएफ रोहित गोदारा गैंग रा मददगार इलियास ने सीकर जिला मांय फतेहपुर रा रामगढ़ सेठान ऊं गिरफ्तार कीनो है। ई बदमाश माथे रोहित गोदारा गैंग रा सदस्यां ने शरण देवण रो आरोप है।

काल हनुमान जयंती मणायी जावेला। ई सिलसिला मांय मिन्दरां मांय खास धार्मिक आयोजनां रो सिलसिलो सारु व्हे ग्यो है। केई ठौड़ां मेळा भर रह्या है। राजधानी जयपुर मांय हनुमान जयंती रे मौके शोभायात्रा निकाळी जावेला। काल ई संत पीपा जयंती ई मणायी जावेला।

पद्म पुरस्कारदृ2026 सारु ई साल 31 जुलाई ताई नाम मण्डाया जा सके है। पद्म पुरस्कार ऊं नवाजी जावण वाळां रा नाम रो आवता साल 26 जनवरी ने ऐलाण कर्यो जावेला। गृह मंत्रालय रे मुजब पद्म पुरस्कार सारु केवल **राष्ट्रीय पुरस्कार पोर्टल** माथे ऑनलाइन तरीका ऊं ई नाम मण्डाया जा सके है। पद्म विभूषण, पद्म भूषण अर पद्म श्री देश रा ऊंचा नागरिक मान मांय शामिल है। अ पुरस्कार कला, साहित्य, शिक्षा, खेल, चिकित्सा, समाज सेवा, विज्ञान, इंजीनियरिंग, लोक प्रशासन, सिविल सेवा, कारोबार अर उद्योग हलका मांय बेहतरीन काम करण सारु दिया जावे है।

पाली मांय नेशनल हाई-वे नम्बर-162 माथे एक बेकाबू ट्रैलर रे दूजा ट्रैलर ऊं टकरा जावण रे कारण दोन्यू गाड़िया मांय लाय लाग गयी। हादसा रे कारण एक ट्रैलर रा ड्राईवर री मौत रा समाचार है। हादसा पाछे हाई-वे माथे गाड़ियां री लम्बी लेणां लाग गयी।

अर अब खबर आई.पी.एल. क्रिकेट री-

- आईपीएल क्रिकेट मांय आज चेन्नई सुपर किंग्स अर कोलकाता नाइट राइडर्स बीचे मुकाबलो व्हेला।
- ओ मैच अब ऊं थोड़ी देर पछे साढ़े सात बज्यां चेन्नई रा एम. ए. चिदंबरम स्टेडियम मांय सरु व्हेला।
- चेन्नई सुपर किंग्स री कप्तानी रितुराज गायकवाड़ री ठौड़ महेन्द्र सिंह धोनी करेला, जद के कोलकाता नाइट राइडर्स रा कप्तान अजिंक्य रहाणे व्हेला।